

Seramai 414 individu ditahan ingkar PKP

Astro Awani

03 Mei 2020

Fauzi Suhaimi,

PUTRAJAYA: Polis Diraja Malaysia (PDRM) menahan seramai 414 individu kerana ingkar Perintah Kawalan Pegerakan (PKP) di seluruh negara.

Menteri Kanan (Kluster Keselamatan), Datuk Seri Ismail Sabri Yaakob berkata, daripada jumlah itu, seramai 407 individu direman manakala tujuh daripadanya dijamin polis.

Beliau berkata, jumlah penahanan itu meningkat berbanding 410 individu yang ditangkap semalam.

"Jumlah tangkapan kumulatif ingkar PKP sehingga 2 Mei 2020 (semalam) adalah sebanyak 23,680 individu.

"Selain itu, sebanyak 36,345 pemeriksaan mengejut telah diadakan di seluruh negara dengan sebanyak 5,833 premis telah diperiksa oleh pihak berkuasa," katanya dalam sidang media harian pada Ahad.

Sementara itu, Ismail Sabri berkata, PDRM bersama Angkatan Tentera Malaysia (ATM) telah mengadakan sekatan jalan raya di 823 lokasi seluruh negara.

"Hasil daripada sekatan itu, pihaknya juga telah melakukan pemeriksaan ke atas 552,999 kenderaan," katanya.

Dalam perkembangan lain, beliau berkata, Suruhanjaya Komunikasi dan Multimedia Malaysia (SKMM) membuka sebanyak 255 kertas siasatan berkaitan berita palsu COVID-19.

"Daripada jumlah tersebut, sebanyak 175 masih dalam siasatan, manakala 26 kes telah didakwa di mahkamah, 11 diberikan notis amaran dan 15 telah mengaku bersalah," jelasnya.

**© 2020 Astro Awani Network Sdn. Bhd.
(535275-D) All Rights Reserved.**

Source: <http://www.astroawani.com/berita-malaysia/seramai-414-individu-ditahan-ingkar-pkp-241290>